

國子監志

國子監志卷四十

樂志六

舞器圖說

節二

羽三十六


籥三十六

謹案釋奠用舞肇始劉宋逮及隋唐相沿為制  
宋金元三代釋奠止用登歌不設佾舞于是升  
降綴兆闕畧無聞明初始用文舞制未詳備我

朝考定樂章。于侑舞尤協古今之宜。康熙五十四年。


勅頒太學樂舞器。春秋釋奠。司之太常。肄習有素。節奏  
嫺雅。聲容之盛。迥越前代。茲敬繪  
文廟舞器。各自為圖。並為說如左。

節



節二。結旒為之。朱杠長七尺二寸九分。圍三寸二分七釐。上曲為塗金龍首。長九寸七分二釐。銜旒九重。各六寸四分八釐。蓋以金葉。束以綠皮。繫長五寸七分六釐。綏長七寸二分九釐。司樂執以居前。

羽



羽三十六。木柄植雉羽。長二尺九寸一分六釐。  
銜以塗金龍首。四寸八分六釐。柄繫朱。長一尺  
九寸四分四釐。圍九分七釐。執以右手。

箭

國子監志

卷四

樂志六





箭三十六。截竹為之。長一尺七寸五分。一柱徑四分六釐八毫六孔。聚朱執以左手。

附

明

文舞士左籥右翟舞師二人執翺以引之

明史樂志

籥長一尺。朱紅漆。笙竹為之。上開三竅。翟長三尺五寸。朱紅漆柄。金龍吞口。上綴雉羽五層。翺長七尺五寸。朱紅漆柄。金龍吞口。懸白鷺羽九

層

續文獻通考

謹案洪武四年定釋奠用文德舞。本六佾也。成化十二年增為八佾。嘉靖九年仍改六佾。詳見

樂制

國子監志卷四十一

官師志

臣等伏惟官以國子名。蓋始於晉。改學為監。始於隋。其博士本秦官。最為古矣。宋元以來。官次始備。

聖朝因之。官於斯者。濡染洪範。琢磨圭璧於職。最為優。其名績之顯晦。職業之廢舉。固不可得而沒也。謹誌設官典守。銓除儀制。官師表八卷。為官師志。

官師志一

設官

○兼管國子監事大臣

雍正三年設。初順治元年。設國子監祭酒以下各官。監中事宜俱禮部總之。十五年。

命監事專屬之國子監。康熙二年。復隸禮部。十年。仍專屬國子監。至雍正三年。

世宗憲皇帝特命康親王果郡王領監事。由是兼管大臣並奉

特旨簡用。

謹案乾隆三十年蒙古教習期滿引

見。

上詢以蒙古語奏對失次。

詔特派悟勒穆濟董之三十七年復

命法福里兼管國子監蒙古司業並奉

特簡後不常設謹附識於此。

○祭酒

順治元年設秩正三品。

初兼太常寺少卿銜後停兼

滿洲漢

人各一人。十六年改秩從四品。

○

聖祖仁皇帝御製祭酒箴

予敷文德。式禮辟雍。允惟祭酒。多士攸宗。在昔有虞。命夔教胄。洎於成周。升彼孝秀。撫今區夏。遵路陳常。海域遣子。願齒膠庠。爾長乃司。表率匪易。木繩斯直。玉琢斯器。烝烝譽髦。爾儀是型。濟濟橋門。爾訓是聆。惟廉持躬。惟慎率屬。佻達其懲。戒董其勗。皇矣謨典。如鏗金鏞。闡揚罔盡。則儆奚從。毋矜而華。導之誠正。

毋詭而趨。範之孔孟。王化丕盛。視乎成均。苟隳厥職。曷明人倫。儒行克臧。汝績乃效。黽勉詔熾。助宣聲教。

○司業

順治元年設秩正六品

初兼太常寺丞銜後傳兼

滿洲二人

分左右二翼各一人

蒙古一人漢人一人乾隆十三年

裁滿洲司業一人以一人兼理左右翼

○監丞

順治元年設秩正八品滿洲漢人各一人乾隆

元年改秩正七品



○博士

順治元年設秩從八品滿洲一人漢人三人十年裁漢博士一人康熙五十二年復裁漢博士一人乾隆元年改秩從七品

○典簿

順治元年設秩從八品滿洲漢人各一人

○典籍

順治元年設秩從九品漢人一人

○助教

順治元年設秩從八品漢人十有二人分莅率性修道誠心正義崇志廣業六堂十五年裁助教六人乾隆元年改秩從七品

○學正

順治元年設秩正九品漢人十有二人亦分莅六堂康熙三十八年裁學正六人五十二年復裁學正二人以四人分掌率性修道誠心正義四堂乾隆元年改秩正八品

○學錄

順治元年設秩從九品漢人六人亦分莅六堂十五年裁學錄四人以二人分掌崇志廣業二堂乾隆元年改秩正八品

○八旗官學助教

順治元年設秩從八品滿洲十有六人清文八人清漢八人蒙古八人十八年裁蒙古助教四人康熙五十七年裁滿洲助教四人雍正二年復設蒙古助教四人三年復設滿洲助教四人乾隆元年改秩與六堂助教同

謹案雍正六年。理藩院臣奏俄羅斯遣其陪臣子弟魯喀等七人來學。

詔王大臣簡選國子監滿漢助教引

見。以滿洲漢人各一員。專司教事。九年。

詔從祭酒鄂爾奇之請。於六堂額外專設俄羅斯漢助教一人。乾隆十五年。祭酒吳達善。陸宗楷。請嗣後漢助教。照滿助教例。不必額外專設。祇令六堂助教兼理。

詔從之。

○算學助教

乾隆四年設。秩從七品。或滿洲或漢人一人。先是算學統於八旗官學。後改設於欽天監附近之地。至是

命改稱國子監算學。專隸於監。

○筆帖式

順治元年設。自七品至九品。視其出身有差。滿洲四人。漢軍二人。十八年增設蒙古筆帖式二人。

附

元

國子監。至元初。以許衡為集賢館大學士。國子祭酒。教國子與蒙古大姓四集。賓人員。至元二十四年。始置監祭酒一員。從三品。司業二員。正五品。監丞一員。正六品。典簿一員。元史百官志。謹案典簿品秩。元史闕。

國子學。秩正七品。置博士二員。助教四員。學正二員。學錄二員。典給一員。同上

謹案元制國子監統於集賢院選舉志又云太宗六年設國子總教及提舉官而百官志不載蓋草創之制非常設之員也

國子監有司樂一員典籍二員管勾一員及司

儀舍人等官

元史選舉志

謹案元制國子監國子學外有蒙古國子監國子學俱統於蒙古翰林院所習者蒙古新字選舉志序稱當時仕進多歧出身於學校者有國子學監學又有蒙古字學回回國學其設官品

秩亦與國子監學大約相同。因與集賢院所統之國子監不相涉。概不載入。

明

國子監祭酒一人。從四品。司業一人。正六品。其屬繩愆廳監丞一人。正八品。博士廳五經博士五人。從八品。率性修道誠心正誼崇志廣業六堂助教十五人。從八品。學正十人。正九品。學錄七人。從九品。典簿廳典簿一人。從八品。典籍廳典籍一人。從九品。掌饌廳掌饌二人。未入流。

明史



職官志

謹案此明太祖洪武二十四年所定。成祖置北京國子監。皆循是而稍加損益。故具列於此。

永樂元年。置國子監於北京。設祭酒。司業。監丞。典簿。博士。學正。學錄。掌饌。各一人。助教二人。同上永樂以後。監中屬官。增設不常。助教至十五人。學正至十一人。學錄至七人。後裁助教二人。學正四人。學錄二人。萬曆二年。又裁助教四人。學錄一人。同上

宣德九年。省司業。同上

宏治十五年。復設司業。同上

謹案晉以國子學教大臣子孫。太學教凡民俊秀。唐宋並以國子監統國子學太學。元時監學並設。尚沿舊制。其并學於監。則自前明始。國朝因之。而制度益加詳云。

國子監志卷四十二

官師志二

典守

○兼管國子監事大臣總理本監一切事務

○祭酒總司監事董率其屬以教貢監官學生

凡六堂八學教學之勤惰隨時稽核凡貢監生

入監者分班肄業以經義治事之法教之立課

程以董之時講書而啟迪之月朔考到則公閱

以定去取月望大課則輪試以第優劣有事故

者則以賙助恤之歲終甄別去留期滿各視學之成否而咨焉察其經明事治者保薦而備用滿洲官學生則以季考較課業兼試以習射將行鄉試則與兼管大臣司業輪遞考到錄科合格者送順天府與試凡貢監官學生考職及應考各途均為之咨送凡拔貢之續到者則會同禮部奏考優貢亦如之三年

京察則書各屬之考差其等第六堂助教有缺以學正學錄資深者題陞學正學錄有應陞部院

司務經歷等官。而司迪素優者。保留以助教陞用。凡應送倉差及滿員應送同知通判等官者。均遴選而保送之。官學生及算學生。當考恩監者。三年一舉。奏請考試。官學生有缺。則遴取。俟補教習期滿。帶領引。

見。凡奏事循其班。稽核本監錢糧之出入。歲終奏銷。丁祭則遴派執事官。凡月朔主行。

聖廟釋菜禮。滿漢執掌同。

○司業職貳祭酒。凡率官屬以行政典。董師徒。

以勤教學及遴選保送課試甄覈皆贊行之亦  
滿漢職掌同惟蒙古司業專司八學蒙古教學  
事稽核其功課蒙古官學生有缺則與祭酒遴  
補不與八學滿洲學務及六堂課試之政凡月  
望主行

聖廟上香禮皆各司業遞司之奏事亦循其班引  
見則與兼管大臣祭酒帶領之

○監丞掌學規以督教課察勤惰核支銷凡貢  
監生到監查驗單照文結朔日呈堂上官考到

甄取榜示後分撥六堂以教之未補班者望日

隨大課較隨課之多寡補內外班肄業

諸生就內班或

外班者各聽其自行填寫

稽其曠怠者申飭之失儀者糾正

之不率者懲戒之書於集愆冊凡給假者書其

月日並籍貫年貌銷假則查核冊籍而分別使

之復班大課錄科則監試肄業期滿者咨部銓

選應考職者咨部彙考八旗漢教習有缺則咨

部傳補期滿則第其功課而呈於堂上官祭酒

莅任則呈送儀注凡丁祭則先期開具人數移

咨太常寺習儀祭時侍班

崇聖祠朔望拜

廟先期率各執事習儀至日隨班行禮凡本監師生暨人役咸聽糾察亦滿漢職掌同有缺而新任者未受事則博士助教攝之

○博士掌明經說以助啓迪月以經義經解策論試諸生凡六堂諸生課卷校閱後按月呈堂上官八旗官學生漢館文課亦如之凡

聖諭及



御製詩文頒於監者。恭繕冊而藏之。諸生領讀。

御書樓書籍。則識之於簿。讀畢。仍行取貯。其六堂八學存貯官書。每歲五月十月。呈堂派員查驗。取結。大課錄科。則巡場琉球官生入學。則董率教習課之。與六堂分日稽察南學。司業莅任。呈送儀注朔望拜。

廟丁祭。均司分獻。亦滿漢職掌同。有缺而新任者。未受事。則監丞助教攝之。

○助教○六堂漢助教各莅事於本堂。掌分教。

直省貢監生諸生歸堂肄業則以經義治事立課程限日計功劄記所疑而請益者條分辨析之稽其勤惰別其功過移繩愆廳籍記不率者面訓之不悛者白堂上官以俟懲辦諸生領讀本堂書籍則識之於簿立限呈繳每五日一講書月上旬而課之肄業滿一年則第其文行覈實註冊移繩愆廳呈堂列為一二三等其文藝生疎者列為又三等月稽內外班人數移繩愆廳發膏火衣服銀

內班給膏火銀  
外班給衣服銀

凡諸生有疾

請假暨他事故則呈之堂上官批發繩愆廳籍  
記報滿亦如之銷假復班或有故改補內班改外班  
內班改外班則核實呈堂移繩愆廳辦理凡將鄉試則  
籍本堂諸生移付典簿廳記冊以待錄科其貢  
監生錄科於考到後分堂投遞親供以察頂冒  
鄉試則赴貢院識認本堂肄業生考教習考職  
亦如之每月查內班肄業則統六堂而稽之飭  
曠怠者分日稽察南學整肅學規凡本堂書籍  
器物皆籍記之去任則授代者大課則巡場考

到錄科則監試有缺而新任者未受事則同堂  
學正學錄攝之○八學滿助教學教本旗滿洲  
漢軍之子弟滿文班肄清書繙譯滿洲教習一  
人課之漢文班肄經書文藝漢教習四人課之  
均兼步射騎射則弓箭教習一人課之咸統於  
助教凡學生宜滿文宜漢文量才分撥督率諸  
教習各勤所職日有課程不率者懲戒之重則  
呈斥決月一合課一演騎蒙童使背書以觀教  
習勤惰春秋彙呈其冊於堂上官以聽季考歲

終統稽一歲之課。回堂甄別。學生有缺。咨旗遴補。滿十年無成者。退回本旗。皆呈明堂上官辦理。凡教習及學生領讀本學書籍。並識之於簿。立限呈繳。凡書皆籍記之。去任以授代者。有缺而新任者未受事。則同學助教攝之。○蒙古助教掌教八旗蒙古子弟。董率蒙古教習一人。課學生以蒙古語言文字。繙譯。學生願習漢文者。撥歸漢館。其蒙古弓箭教習。課步射騎射者。與滿洲助教同董之。考稽職掌。並同滿洲助教有

缺而新任者未受事則附近助教兼理之凡朔  
望

聖廟分獻土地祠主行上香禮丁祭分獻及土地祠  
主獻或執事

大成殿堂期監用堂印皆各助教遞司之○算學  
助教掌分教算學生課以天文算法凡肄習算  
法中線面體三部各以一年為程通曉七政共  
以二年為程每季小試歲終大試凡稽察教習  
課程文移案卷皆所專司頒有關防鈐用以專

職守。○俄羅斯學助教。掌分教俄羅斯來學子弟。不常設。若准理藩院來咨。則派滿漢助教各一員兼理。無專官。滿漢職掌同。

○率性修道誠心正義四堂學正。崇志廣業兩堂學錄。職掌執事監印。悉與漢助教同。每月下旬。則課本堂貢監生。有缺而新任者未受事。則同堂助教兼理之。

○典簿。為本監首領。掌簿書以稽文移之出入。凡本監事務當咨各衙門者。日月報以咨欽奉。

上諭處內閣稽察房吏部

起居注曰季報以咨戶部湖廣道曰年報以咨都  
察院凡錢糧之咨領於戶部者曰本監漢堂屬  
俸銀俸米曰本監滿漢堂屬公費曰八旗算學  
各教習銀米曰算學生月銀曰中式舉人旗匾  
新進士題名碑銀曰皂隸口糧曰年例公用物  
件凡

聖廟廨舍之筦鑰咸謹掌之屋宇當修則咨部繕葺  
器用亦如之籍記祭器樂器敬儲於庫他器物



均書於冊。去任以授代者。凡值鄉試。查核內外  
班諸生。及各貢監生之應赴試者。稽其單照文  
結。具冊呈堂上官。輪遞出題錄科。其直省特來  
鄉試者。均驗明文結單照。呈堂考到。分撥六堂  
察頂冒。錄科則別正途俊秀。而按期試之。凡本  
監各官陞調。及他事故。皆具稿咨部。丁祭則先  
期陳設。監視宰牲分胾瘞埋諸典禮。祇肅將事。  
祭時侍班。

大成殿。朔望執事與各官同。監造進士題名碑。辦

理釋褐花紅約束本監書吏兵役有缺而新任者未受事則六堂攝之

○典籍掌本監書籍碑石版刻凡

頒賜

御製書

欽定書

欽定墨刻及經史子集各種存貯

御書樓俱以類分櫝而謹藏之凡

頒賜之年月日書若干部部若干卷並冊記之本監

堂屬取讀。皆謹書於簿。讀畢取貯。諸生取讀。則立限呈繳。失者責償。凡題名碑記。以及歷代石刻。均歸職掌。本監版刻暨

武英殿寄監存貯版刻。均立冊詳識數目。凡書籍版刻之冊。皆鈐以監印。新舊交代。則詳驗而悉數之。夏月督率匠役開曬。印刷各書。嚴防損壞。歲終則查報無缺。存案備稽。或歲久書蠹版泐。隨時修補。考課則與各廳六堂八學等官輪次掌收試卷。丁祭朔望。均執事。

大成殿有缺而新任者未受事則博士攝之

○筆帖式掌文移繙譯滿洲蒙古漢軍職掌同

○錢糧處由堂上官遴委本監官六員兼理掌

支領

恩賞銀兩以給歲支凡定例得支者曰內外班諸生膏火衣服銀曰前列獎賞曰事故賙助曰學舍歲修曰大課及六堂講課公膳曰修理考課及公用器物咸經理之按季呈堂上官核算歲終咨部奏銷

○辦照處由堂上官遴委本監滿漢官各三員兼理。泐歲而易之。掌給貢監生監照。凡貢監請給監照者。核戶部執照。暨戶部各省之來冊而後給之。立冊記之。鈐以監印。其有新捐者。上兌三日內呈報註冊。及由監加捐者。均待照呈驗後。方咨戶部上兌。凡諸生舉鄉試。或斥革事故。均追繳監照驗銷。

○當月處本監滿漢各官遞司之。掌傳抄

諭旨。凡各衙門文移收而識之號簿。次日呈堂上官。

以發所司者經理。

○檔房滿洲助教筆帖式理之。掌繕譯繕寫清文奏摺。及各衙門文移辦理。

京察冊籍。其行咨各衙門者。曰咨送倉差稅差關差。曰考補滿洲助教教習。曰滿洲蒙古漢軍官員。棟選部院堂主事。部寺司庫。各衙門筆帖式。外省同知通判知縣等官。曰八旗官學各官告假。曰蒙古教習。遴選補缺。期滿出缺。曰選取八旗官學生。曰八旗官學生考試庫使。曰漢軍官

學生考取外郎曰奏考八旗恩監生均行文經理。凡朝會大典先期傳知本監各官。

○教習掌分課八旗官學本館學生統於助教。凡官學滿洲蒙古教習各一人。漢教習四人。蒙古弓箭教習一人。滿洲教習。掌教滿洲學生。清書繙譯。蒙古教習。掌教蒙古學生。蒙古語言文字繙譯。漢教習。掌教經書文藝。蒙古弓箭教習。掌教合學騎射。凡滿洲學生宜習清文習漢文。均由助教量才分撥。蒙古學生習蒙古文或願

習漢文者聽凡滿漢教習之職。學生每日到學。各令畫到。授書背書講書覆講習字默寫經書。日有課程。有不率者責懲之。旬之三八日習滿文者課清書繙譯。習漢文者課文藝。一切功課並督學生隨日籍記。彙交助教。按月由博士呈本監堂上官查核。春秋赴監聽堂上官季考。凡官學生肄業以十年為限期。滿者報監開缺。教習朔望赴監。隨本監官拜。

廟。蒙古教習課程與滿漢教習同。蒙古弓箭教習。



日教一館學生騎射一學六館凡六日而徧旗

官學各滿洲館一蒙古館一漢館四決月則率學生出城校射以

為常課蒙古教習朔望不赴監拜

廟。

謹案國子監堂屬各官典守事宜謹遵嘉慶十

七年。

欽定會典事例道光二年。

欽定國子監則例分晰開載至前此屢有更定現在  
俱仍遵奉施行當敬錄以備參考者併識於後。

順治元年。定國子監條規。祭酒司業。職在總理  
監務。嚴立規矩。表率屬員。模範後進。監丞職在  
繩愆。凡教官怠於師訓。監生有戾規矩。並課業  
不精。悉從糾舉懲治。立集愆冊。登記備考。博士  
助教學正。學錄職在教誨。務須嚴立課程。用心  
講解。如或怠惰。致監生有戾學規者。堂官舉覺  
罰治。典簿職在明立文案。并支銷錢糧。季報文  
冊。典籍職在收掌

御書樓一應經史書籍版片。滿洲蒙古漢軍監生。責

成八旗助教。漢監生責成漢助教學正學錄等官。務在嚴加訓誨。不得怠惰徇情。以致廢弛。康熙二十四年。申嚴監規。

御書樓書籍版片。不時查閱。如有刷印方開。不許印匠損壞。火燭尤宜小心。檔房各項文牒。官吏小心收貯。不許帶歸私寓。凡有查閱。卽時呈覽。二十七年。禮部議准。琉球國陪臣子弟入監讀書。由監於附近房屋撥給十餘間。為住居之所。取貢生一人。令其教習。博士一人。專管董率。祭

酒司業等不時稽察俾講解經書學習道藝

三十一年。禮部覆准國子監季考月課雖有成例恐日久廢弛嗣後考試務親身督課分別獎勵每月朔望令滿漢肄業生齊集講書如視為具文不實心奉行從重議處

雍正二年覆准令祭酒司業轉飭助教教習等每日親臨官學不時巡察獎勤儆惰每月傳至監考試一次

又禮部議准琉球國陪臣子弟入監讀書照康

熙二十七年例遴選文行兼優貢生盡心訓迪委博士一人董率本監堂官不時稽察其教習生廩糧咨部考職等項照官學教習之例其子弟住房食用四時衣服亦統令稽察務令得所是年博士適缺員

詔從監臣之請派學正一員董率之

乾隆元年議准御史毛之玉奏國子監祭酒司業所管貢監生為數繁多耳目難周其助教等官分司訓課派撥入堂各有專屬稽察便易應

將貢監生責成助教等留心體察有不安本分  
實跡可據者申報祭酒司業查究若稍徇姑容  
不行舉報發覺一併處分

二年御史薛勣奏准國子監責成祭酒司業董  
率屬員以道藝經術造士其不肖者指實參糾  
若查有訓士實跡即行議敘至品端學正師道  
尊嚴者隨時薦舉陞用

又兼管監事尚書孫嘉淦奏准國子監監丞堂  
期到廳辦事外朔望日稽查拜

廟諸生有無齊集。凡執事不謹班次參差。俱應查察。每旬查堂一二次。遇堂上官講課。整肅堂規。分別功過。秉公核實。不得徇徇。六堂助教學正學錄。每逢講課之期。務須早集辦事。朔望各詣本堂公案。敦勉諸生。不得視為具文。至督課諸生。批晰劄記。閱定課藝。必按期呈堂。核定發閱。仍繳本堂存貯彙核。

三年。兼管監事尚書孫嘉淦奏准。官學生入學。三年內專歸漢教習教授經書。三年之後。有願

習繙譯者。責成助教。專教繙譯。凡官學一切事務。助教辦理。蒙古官學。責成蒙古助教。撤回舊設喇嘛八名。

四年。兼管監事大學士趙國麟奏准。祭酒司業月課。出四子書題一道。五經講義各一道。治事策問各一條。至六堂助教等官。按月考課。亦照此例。

五年。兼管監事大學士趙國麟奏准。助教等官課士宜嚴。查六堂助教學正學錄。每堂二員。以



司教課該員或分課或輪班或居住南學必須朝夕講誨稽其課程察其勤惰辨其優劣禁其浮蕘其實力奉行者分別記功

京察列為優等怠荒厥職者重則即行題參輕則分別記過

京察列為下等

十一年兼管監事侍郎宗室德沛奏准凡援例貢監各於報捐所在將本生年貌籍貫三代履歷造冊送監本監設立號簿列名詳記各給監

照一紙在外報捐者發與督撫轉給在部報捐者本生到監親領如有斥革病故一面報部一面繳銷監照

又議准八旗官學子弟分有清漢兩途助教一官有督率一學之責不但教習繙譯即漢教習亦應稽查

二十二年順天府尹劉綸奏大宛兩縣貢監生頗有冒籍

諭此等貢監生分堂肄業年貌語音不難立辨應專責

成於本監官。令於肄業時嚴加察驗。以杜假冒。倘濫行收考。一經發覺。嚴加議處。

嘉慶二年。戶部覆准。漢監丞博士助教學正學錄典簿典籍。均准一體保送倉差。

道光六年。管理算學侍郎宗室敬徵奏。准算學舊設簡缺書吏一名。嗣後役滿考職。按照各衙門書吏定例辦理。無得混行留學。

又奏。准算學一切文移。照舊鈐用助教關防。以備稽核。嗣經禮部新鑄關防頒給。

十年。兼管監事侍郎李宗昉等奏准。凡捐生於戶部上兌三日內。赴監呈明。本監編立籍貫履歷冊。每月初十日。持赴戶部與收捐冊磨對。其由監捐貢。并貢監加捐職銜者。亦赴監呈明。彙冊咨部上兌。

○吏役職掌

附

國子監額設書吏九名。堂書四名。東廂案房。繁缺西廂案房。簡缺並承辦堂行事件。堂印房。簡缺承辦用印事件。堂火房。簡缺管硃盒筆硯繩愆廳一名。

繁缺管本廳文案博士廳一名簡缺管本廳文案兼

辦六堂典籍廳事件典簿廳二名案房繁缺管本

廳文案印房繁缺管用印事件檔房一名繁缺管本

房一切文案算學額設書吏一名簡缺管算學一

切文案

○額設阜役二十九名堂阜八名繩愆廳二名

一兼錄黃旗博士廳三名一兼正黃旗典簿廳

二名專辦本廳率性堂二名一兼正白旗修道堂二

名一兼正紅旗誠心堂二名一兼鑲白旗正義

堂二名

一兼錄紅旗  
官學差使

崇志堂二名

一兼正藍旗  
官學差使

廣業堂二名

一兼錄藍旗  
官學差使

算學二名

專辦以上  
本館

各役兼灑埽伺候巡視啟閉輪班值日考試驅逐閑人呵禁出入

○額設廟戶十三名灑埽廟祠封鎖門戶殿戶

八名役亦如之兵丁十二名徼巡廟門

由步軍統領衙

門橫廚役一名司廚茶庫一名司茶刷印匠四

名刷印書籍並歸本管官約束

○稽驗簿冊

附

○堂行簿。由堂上官判押。凡文移出入月日事。由具載焉。

○堂諭簿。凡堂上官批發事件。或特有飭諭。所司各詳識於簿。

○考勤簿。凡四廳六堂八學。檔房均設。每堂期呈堂上官查驗。八旗教習另有考勤簿。本學助教司之。月終呈堂上官查驗。

○交代冊。凡四廳六堂八學。錢糧處辦照處。當月處檔房。遇陞遷事故。均立交代冊。將蒞任以

來經理檔案各事。新舊交代呈堂上官鈐印書吏役滿亦令其具並無遺失結狀。接辦經承亦具接辦結狀。本管官驗明呈堂上官核覽。附卷備查。

○肄業驗照簿。繩愆廳司之。凡貢監生到監肄業。親攜文結單照赴廳驗訖。畫押於簿。月朔呈堂上官考到。閱定甲乙。由廳出榜曉示。按名逐月造冊。試卷用印鈐封。與點名冊俱存廳備查。

○肄業撥堂冊。繩愆廳司之。凡貢監生考到後。



未經補班。繩愆廳查照考到名次先後按堂分  
機周而復始。備書於冊。六堂各官亦各詳識諸  
生年貌籍貫存冊備查。

○補班冊。繩愆廳司之。凡貢監考到錄取後應  
大課一次。例得補班。其肄業月日皆入此冊起  
算。內班註明所居號舍。每月大課一次。本堂課  
二次。俱面試。外班註明舍館僦寓之所。其離京  
三十里外者。不准補班。每月大課亦面試。本堂  
課則於大課時給題。限日親繳。內班曠課一月

者改外外班曠課三月者扣除

○大課點名冊繩愆廳司之凡兼管大臣祭酒司業月課曰大課按六堂分晰內外班造冊呈堂上官點名考試當堂給發膏火其未補班及復班者均附於後一體考試試畢封貯存查

○大課等第冊繩愆廳司之凡大課取定等第出榜曉示仍立冊存案

○給假冊繩愆廳司之凡內外班諸生或遇有省親回籍等事赴本堂官稟明本堂官帶領呈

堂上官給假移廳備書事由於冊並載年貌籍貫坐監年月復班則按冊補曠其復班逾限無本地方官文結申明稽延之由者以前肄業年月不准接算

○集愆冊繩愆廳司之凡貢監生不遵學規者即行申飭備書此冊示戒

○報滿冊繩愆廳司之凡內外班恩拔副歲優貢生及廩貢生肄業三年期滿者本堂官查明有無

恩免告假考劣記過應扣月日帶領赴堂上官處遞呈批發查核詳識此冊照例咨部銓用俊秀貢監不咨選亦記冊備查

○咨送考職簿繩愆廳司之凡鄉試前一年逢今

試年舉行恩詔鄉吏部咨取考職貢監由廳查驗本

生執照本籍來文同鄉六品京官印結詳記於簿呈堂上官彙送

○漢教習補缺冊繩愆廳司之凡八旗官學漢教習傳補到監及前此已補現來銷假者其告

假先後俱開列於前。現任將滿教習報滿年月開列於後。由廳呈堂上官查驗。

○功過簿。繩愆廳司之。凡本監滿漢各屬記功記過各識事由及年月日於冊堂上官標發繩愆廳收存。

京察參閱分別殿最。

○禮儀簿。繩愆廳司之。凡朔望拜廟及

崇聖祠土地祠。繩愆廳將

大成殿四配兩廡分獻及後殿土地祠等處上香  
各官逐次開列於前六堂貢監生充正引哲引  
廡引鳴贊司爵司尊諸執事者開列於後其餘  
隨班行禮者分堂列名親書到字或諸生執事  
儀節生疎隨班行禮臨期不到者並以不遵約  
束記集愆冊香燭祭品典簿先期嚴飭廟戶敬  
謹陳設諸生上堂謁見應分班候齊以次祇揖  
如進退舛錯及不到者指名呈堂上官申飭

○內班畫到簿博士廳及六堂官遞司之每朔

監博士赴南學值日餘日則六堂助教學正學錄分值各於清晨傳齊諸生盡到。質疑問難不拘經史。遇本堂官課期傳集面試批閱。其有暫行請假者由本堂官帶領呈堂批發。繩愆廳註冊。曠功者罰改外班。

○課程冊六堂官司之。凡六堂諸生各令自立一冊。逐日詳識所讀之書。所習之字。每十日呈送本堂官批閱。面加訓示。朔望博士查驗。每月酌休假三日。曠業者量懲。

○官學生補缺冊八學助教司之凡八旗官學生補缺入此冊起算於各生名下註明到學月日屬何佐領及本生三代年歲備查

○官學生記名冊八學助教司之凡八旗官學生經堂上官遴選正取外酌其尚有可造者記名候補備書此冊按名補入讀書俾無撓越補完再行各旗咨取

○官學生畫到簿八學助教司之凡八旗官學生每日到學於此冊畫到有事給假者註明備



查

○官學生功課冊八學助教司之凡八旗官學各立冊令學生將所讀何書所溫何書每日填寫起止歲終由博士廳呈堂上官查核至教習三年期滿又各將所教學生造冊填明功課一送繩愆廳一呈堂上官以候查核

○官學生季考冊檔房司之凡春秋季考分晰漢文滿蒙繙譯造冊呈堂上官考試兼繕騎射清冊呈堂

○鄉試驗照簿典簿廳司之凡鄉試之年貢監生到監錄科親攜文結及部監兩照赴廳驗訖畫押於簿

○鄉試考到冊典簿廳司之凡貢監生考到由堂上官取定甲乙出榜曉示仍按名次書於冊試卷用印鈐封存廳備查

○錄科冊典簿廳司之凡鄉試之年貢監生赴監驗文驗照錄科其錄取名次先後皆詳悉載冊呈堂上官查核

○鄉試錄科撥堂簿。典簿廳司之。凡鄉試之年。貢監生考到錄取後。分撥六堂。各書於冊。

○親供冊。典簿廳司之。凡鄉試之年。貢監生錄科。取具本生年貌籍貫三代親供。彙書於冊。

○到任簿。典簿廳司之。凡本監堂屬各官。到任年月日。及履歷。詳載備查。

○題奏簿。典簿廳檔房司之。凡本監題奏各事。隨時詳識。歲終。將一年所有奏摺。夾片。呈堂上官查核。

○祭器樂器簿典簿廳司之凡

聖廟祭器樂器及一切陳設分冊詳識鈐印貯廳時  
為查檢

○器用簿典簿廳司之凡公堂兩廂四廳六堂  
南學一切器用俱詳識某處某器若干件於簿  
鈐印存廳備查

○官解簿典簿廳司之凡本監解舍楹數俱繪  
圖立簿存廳備查

○收文簿凡外省文移典簿廳司之在京各衙

門文移檔房司之俱以類分記粘連原卷呈堂上官與當月處號簿查對

○點卯簿典簿廳司之凡兩廂四廳六堂檔房書吏皂役及廟戶殿戶兵丁人等由廳立簿記載姓名朔望點驗

○經籍書版簿典籍廳司之載明書若干部墨刻若干卷書版若干片鈐之以印凡

御書樓所貯書籍典籍掌其成數博士司其出入別刊書目分給六堂貢監生有願領讀者具領紙

向博士廳取閱限日交繳毋許損失博士廳詳  
記領書月日於冊每月呈堂上官與課程冊參  
觀用稽勤惰

武英殿寄監版片歲終清查或全或缺典籍廳悉  
記於簿亦鈐以印

○錢糧支放簿錢糧處司之凡支領錢糧給發  
膏火俱記此簿

○報捐簿辦照處司之凡報捐貢監者照戶部  
及各省來文編載

○籍貫履歷冊。辦照處司之。凡捐生於戶部上  
兌三日內。赴監呈明。由辦照處編立號簿。所有  
捐生籍貫履歷。備書於冊。以備每月初十日持  
赴戶部磨對。咨送江南道。

○鈐號簿。辦照處司之。凡監給各生執照。編字  
排號。記其給發月日於簿。

○銷照簿。辦照處司之。凡貢監生中式。或斥革  
等事故。繳照銷毀者。按各衙門來文編載。

○用印點單簿。辦照處司之。凡蓋用堂印顆數。

委監印官二員記載辦照處亦立簿識之皆呈堂上官過硃典簿廳用印則本廳自立冊識之

○公項簿派員司之凡定例貢監生領照者輸銀二錢以充辦事公用積照千張由所司員按號呈堂上官查核凡公用出入悉登於簿每月呈堂查驗

○當月號簿當月處司之凡各衙門來文編號記簿

○



京察簿檔房司之凡三年

京察大典例於前一年之冬即派員於檔房經理  
本監各屬員考語優劣並行載入

○滿洲蒙古教習補缺冊檔房司之凡八旗官  
學滿洲蒙古教習弓箭教習出缺補缺備書於  
冊呈堂上官查驗

謹案以上諸簿冊俱鈐堂印交各廳官自行記  
載不令書吏涉手昭慎重典守之義焉

附

元

國子監祭酒司業掌國學之教令監丞專領監

務

元史百官志

謹案百官志國子監又有典簿一員不詳其職

國子學博士掌教授生徒考較儒人著述教官

所業文字助教分教各齋生員學正學錄督習

課業典給掌生員膳食

同上

至元二十四年立國子學而定其制設博士通  
掌學事分教三齋生員講授經旨是正音訓上

嚴教導之術。下考肄習之業。復設助教同掌學事。而專守一齋。正錄申明規矩。督習課業。凡讀書必先孝經。小學論語。孟子。大學。中庸。次及詩書禮記。周禮。春秋。易。博士助教親授句讀音訓。正錄伴讀。以次傳習之。講說則依所讀之序。正錄伴讀亦以次而傳習之。次日抽籤令諸生復說其功課對屬詩章經解史評。則博士出題生員具藁。先呈助教。俟博士既定。始附錄課簿。以

憑考校。

元史選舉志

謹案百官志國子學載有伴讀之官而闕其職事蓋史本有之而傳寫脫落矣觀選舉志所載可以互證

延祐二年集賢學士趙孟頫等議定國子學法立游藝依仁據德志道時習日新六齋隸諸生其有不事課業及一切違戾規矩者從學正錄糾舉正錄知見而不糾舉者從本監議罰之上同至正十五年參知政事實勒們言舊立國子監專教四集賽愛滿官員子弟今宜諭令嚴為訓

諫從之

元史順  
帝紀

謹案續文獻通考作元統十五年奏考順帝初  
即位建元元統至三年即改號至元續通考誤

○吏員附

國子監令史二人譯史知印典吏各一人

元史  
百官

志

明

祭酒司業掌國學諸生訓導之政令凡舉人貢  
生官生恩生功生例生土官外國生幼勲臣及

勲戚大臣子弟之入監者奉監規而訓課之造以明體達用之學以孝弟禮義忠信廉耻為之本以六經諸史為之業務各期以敦倫善行敬業樂羣以修舉古樂正成均之師道有不率者朴以夏楚不悛徙謫之其率教者有升堂積分超格敘用之法課業倣書季呈翰林院考校文冊歲終奏上監丞掌繩愆廳之事以參領監務堅明其約束諸師生有過及廩膳不潔並糾懲之而書之於集愆冊博士掌分經講授而時其

考課凡經以易詩書春秋禮記人專一經大學中庸論語孟子兼習之助教學正學錄掌六堂之訓誨士子肄業本堂則為講說經義文字導約之以規矩典簿典文移金錢出納支受典籍典書籍掌饌掌飲饌

明史職官志

凡春秋仲月上丁遣大臣祀

先師則祭酒司業總其禮儀車駕幸太學則執經講義新進士釋褐則坐而受拜

續文獻通考

國子監司業二員分為左右各提調三堂

明史選舉

志

謹案此洪武十六年所定亦見明太學志

成化七年令本監錢糧兼委博士助教廉謹者

公同收支以防奸弊

辟雍紀事

自博士而下每月正堂帖委一員守廟兼同典簿收支各項錢糧凡

聖廟一應禮器樂器雜物皆交盤封固提督廟戶看守春秋丁祭及朔望則督地方及廟戶打掃潔淨六月六日同太常寺遣官開曬樂器放過錢



糧則與典簿公同具數呈東廂。每日升堂同巡風。巡倉庫官報云。守廟無事。又自博士而下。日輪一員巡風。該日號長將巡風簿送本官。並巡倉庫官畫知。本夜提督各該堂長號長及阜隸人役環監號巡視。次日報巡風無事。或生員出號。在號飲酒生事。並一應偷竊鬪毆。事關本監。則次日稟廂裁處。又委六堂一員兼管號舍。凡生員住號修號貼號立簿稽查。號舍損壞及監生撥號不住者。呈堂裁處。又選委六堂一員同

典簿收支錢糧一應出納無小大俱公同照數

登簿呈堂以憑查考

明太學志

國子監銅印方二寸五分厚五分繩愆廳博士

廳典簿廳銅印方二寸厚二分五釐典籍廳銅

印方一寸九分厚二分二釐

明史輿服志

洪武十五年二月頒定監規本監正官職專理

一切事務須整飭威儀嚴立規矩表率屬官模

範後進不可尸位素餐因而怠惰監丞之職所

以參領監事凡教官怠於師訓生員有戾規矩

並課業不精。廩膳不潔。並從糾舉懲治。務要夙  
夜盡公。嚴行約束。毋得瞻徇。以致廢弛。博士助  
教學正學錄等官。職專教誨。務嚴立工程。用心  
講解。以臻成效。如或怠惰。不能自立。以致生員  
有戾。規矩者。覺舉到官。各有責罰。掌饌職備廩  
食。供給師生。務要恪恭。乃事。飭令豐潔。毋得通  
同膳夫廚役使人等。因而尅減。以致不充。違者  
依律問罪。典簿職掌文案。凡一應學務。並支銷  
錢糧。季報課業文冊等項。皆須明白稽考。毋得

通同吏典人等侵損漏落作弊違者並依律處

治

明太祖  
實錄

又五月禮部尚書劉仲質等奏定監規各堂教官每班選厚重勤敏生員一名以充齋長堂宇宿舍俱各整飭應用什物皆已備具務在潔淨閑雜人等不許輒入其在學人員敢有毀污作踐者從繩愆廳糾舉治罪本監官員及官民生並不許將帶家人僮僕擅入紛擾污雜違者從繩愆廳糾治掌饌專供飲食務要恪恭乃事毋

得簡慢。師生病不能行履者。許令膳夫供送。若無病不行。隨衆會食者。不與當日飲食。除三飯之後。不許別與茶飯。橫索者。繩愆廳糾治。乃錄於集愆冊。監丞置集愆冊一本。各堂生員。凡有不遵學規。即便糾治。仍將所犯附寫文冊。以憑通考。初犯記錄。再三犯決竹筴有差。四犯發遣安置。師生所用飯食物料。一一備具。若掌管之官。不將官貯物料放支。別差市夫廚役人等。日逐補辦諸食物者。許生員面奏。從之。上同。

十六年正月又定監規正官嚴立學規察六堂  
講誦課業定生員三等高下六堂師範高下博  
士五員雖分五經共於彝倫堂西設坐教訓六  
堂依本經考課上同

三十年又定監規各堂教官所以表儀諸生必  
當躬修禮節正其衣冠率先勤謹使其有所觀  
瞻庶幾模範後學今後故作闕茸有失威儀者  
許監丞糾舉以憑區處若監丞故不舉察及懷  
私糾舉不當者從監官奏聞區處上同

謹案太學志云。近日修志。前賢建白及逐年事例。多無可考。以不立案故也。故北雍規制。前史闕如。然大約遵洪武初制。蓋明代監規。自洪武以後。有廢弛而無更易。故備錄之以存一代之典。與他篇斷自永樂者稍殊焉。

○吏役附

國子監當該司典吏四名。外兩廂辦事吏。隨吏部撥送。無定數。內吏二名。專守兩廂火房書手二名。博士廳寫課一名。典簿廳一名。廟戶舊十

名後十三名每日輪守廟二名直堂及守各堂  
器用一名把大門二名東西廂各三名繩愆廳  
一名博士廳一名直堂阜隸十名把大門二名  
看朝房二名東廂八名後分僱十名西廂六名  
後分僱八名東廳直廳阜隸三名後分僱四名  
典簿廳直廳二名看倉斗級二名後分僱八名  
庫子二名掌饌廳一名分僱二名膳夫八十一  
名本民僉百名係順天保定河間永平四府所屬  
進年僉替內改撥廟戶十名庫子一名逃  
亡八名存八十一名宏治十五年謝鐸題准本  
監屬官員給一名使用其餘收僱直銀每名十



兩以充徒充膳夫一百五十名刑部例行禮部

轉送後歲送不過二三十名分撥堂廳皆年老貧病不堪實用刷印匠四名

宛大二縣分撥水夫二名東西廂各一人朝房

一人歇家十名答應收糧小腳十二名搬送糧

米仍充本監一應公使明太學志

○稽驗簿冊附

國子監所設簿冊曰公座簿每月一扇每日未

升監前各屬官以次畫訖待兩廂升公座當該

吏先送司業次送祭酒畫訖判日祭酒有故不

至則司業代判曰實歷簿兩廂東廳俱設官生  
舉人一冊歲貢一冊援例生一冊每名下寫係  
某處人由官舉歲例於某年月日入某堂某班  
例生并寫由廩增附貢俊秀各腳色由原籍起  
文部劄送監則為實歷尚須行查者則為暫收  
凡本生出差給假復班皆填註簿曰班簿分三  
十二班每班不論官舉貢例但依入監月日寫  
姓名籍貫及差假等字以便查閱一曰點名簿  
曰監規簿東廂給本生監規登簿訖禮生引赴

西廂兩廳登記限一月內熟背背訖。西廂西廳查驗判銷。再引赴東廂及東廳判銷。曰集愆冊。設於東廳。分三十二班。逐歲月書各生名下。或檄鎖幾日。壓撥幾次。罰曠若干日。有因病久曠者。亦附書。曰舉善簿。本生在監有善行。關風教者。本生師及友長同鄉生。從實呈報書簿。量加獎勸。曰東廂堂稿簿。凡師生各事。與錢糧行各衙門事宜。詳具緣由。逐日書簿判行備考。曰號簿。凡本監各事務。收發各衙門文書。用印掛號。

以防欺僞。曰印簿。凡遇用印。備書某日用印若干。曰撥厯簿。凡監生撥正雜厯名數若干。各以官舉貢例扣足年月。照撥單填註。曰撥差簿。應撥長短差者。明開坐班月日。所撥某差某時復班。曰禮器樂器簿。凡諸器各登總數。每月守廟官交代查點。責廟戶看守。丁祭照數驗發洗滌。祭畢查收。曰器用簿。凡公堂兩廂五廳六堂一應公用器物。照所在多寡數目。開載用堂印鈐記。一存東廂。一存典簿廳。曰官廨簿。凡本監官

房若干。坐落何地。顏圯修整。一一登記。鈐印存東廂。曰內外號舍簿。照例註明。委屬官督同號長巡守。倒塌呈明查修。曰經簿。書版簿。典籍廳逐一登載損缺。查明修補。各堂取閱備載。曰徒役簿。典簿廳查明登冊。曰錢糧簿。俱典簿掌管收放登記。遇月終季終年終。交盤照簿查算。曰卷簿。凡各部公移。或題覆本監奏請。或奏擬本監事宜。到監俱立簿備查。曰供事簿。凡

文廟兩廂兩廳各班禮生講章禮生六堂堂長友長

各舍號長俱登載幾人某姓某名曰巡風簿凡  
二一廳堂官每日輪值巡守內號封鎖外門一  
掌饌官每日輪值巡守倉庫皆先日堂長各持  
所記之簿畫知次日送堂判日曰序任簿凡本  
監官員到任即登記姓名字號籍貫出身到任  
年月陞遷亦如之曰習禮公侯伯卿簿凡已襲  
未襲應習讀者列名每日畫卯曰丁祭訪官簿  
曰集禧簿派各生訪明各官寓所祭畢查各獻  
官陪祭官及六品以下先日拜廟官頌胙曰背

書簿堂上掣籤先赴博士廳背訖再揭試生熟  
送西廂試背生者或責或罰曠皆書曰講書簿  
會講先日開題送西廂裁點具稿送改正發西  
廳錄簿曰查課簿監生每月作課六篇送本堂  
看訖彙送西廳詳定等第揭送西廂列等勸懲  
凡篇數不完字畫潦草者計篇罰責悉載曰查  
倣簿監生每日寫倣一幅送本堂圈改月終送  
西廂查驗責者悉註曰六堂通知簿天順三年奏准以  
備撥厯者曰各堂勘合文簿舊定監規凡積紅

圈七百以上者升率性堂曰六堂卯簿每生二  
行行十五日每日到堂畫卯不到者本堂判不  
到呈廂究治曰歲報冊自去年十二月十六日  
起至本年十二月十五日止一應官恩舉貢例  
監凡舊管新收開除實在各若干查開呈堂奏  
進仍具清冊送禮科上同

歲報監生冊即周人學士之版也每歲終總一  
歲諸生之數分舉貢官例舊管新收開除實在  
之目以獻於天府人材興替於是驗焉續文獻  
通考